

Ils quitads da retg Gion Carl

Tranter il parlament da Catalugna e las elecziuns bascas

(gsc) Il retg da Spagna ha gist avert ina pagina d'entrada (www.casareal.es). El l'ha duvrada ils 17 da settember, sis dis suenter la manifestaziun d'in milliun e mez Catalanas e Catalans per l'indipendenza da lur pajais (v. La Quotidiana dals 20 da settember).

Il schef dal stadi ha declerà: «Lo peor que podemos hacer es dividir fuerzas, alentar disensiones, perseguir quimeras, ahondar heridas» («Il pir che nus pudessen far fiss da fracziunar forzas, promover discordias, suandar fantasias, profundar feridas»). La renumada gassetta regiunala «Sud-Ouest» (Bordeaux), cun correspundents en la Spagna vischina, commentava ils 20 da settember: «Il retg, scrivend questa brev averta al pievel spagnol, pensava senza dubi er als partisans da l'indipendenza basca: Lezs pudessan fitg bain gudagnar las proximas elecziuns [dal cussegl grond ils 21 d'october] e governar Euskadi [la Cuminanza autonoma basca] durant ils proxims quatter onns (...). Mai dapi il putsch dals 23 da favrer 1981 n'aveva il retg sa maschadà uschè cleramain en la politica interiura da ses pajais (...). Quai è senza dubi ina strategia nova da communicaziun per la curuna che vul meglierar sia reputaziun. 2012 ha numnadamain manà plis scandals en il palazi roial: Il schender dal retg (...) è vegnì involvì en in affar da corrupziun e da defraudaziun da daners publics e privats, e Gion Carl sez è i [a Botswana] a chatschar elefants gist en in temp d'austeritad [en Spagna]. Tiers vegnan ils suspects da nundumbraivlas aventuras amurusas.» 1981 ha il retg gidà a rinforzar la democrazia; oz emprova il medem retg da disfamar l'exercizi democratic dal dretg d'autodeterminaziun.

A Barcelona suenter la manifestaziun

L'istoricher Miguel Martorell (Universitad Uned, Madrid) punctuescha: «Mo in uman è responsabel da l'intervenziun dal retg en il cumbat politic: Il president da la regenza. Lez sto ratifitgar mintga acziun dal retg, e quai tenor ils art. 56 e 64 da la constituziun» («El País», Madrid, 24 da

settember 2012, p. 27). Commentà il mesadi roial ha era Francesc Homs (Barcelona), pledader da la regenza catalana: «La Catalugna contribuescha cun schliaziuns che n'èn tuttina betg fantasias.» Il parlament catalan dumbra 135 deputadas e deputads; 86 han sustegnì la manifestaziun per l'indipendenza, en il senn d'ina moziun da mars 2011 che scheva: «Il parlament resguarda il dretg dals pievels a s'autodeterminar sco in dretg irrenunziabel dal pievel da Catalugna.» Artur Mas, president da la regenza catalana, pudess annunziar proximamain elecziuns anticipadas per il 25 da november, pia tshintg emnas suenter quellas d'Euskadi. Co va tut quai vinvant?